

瑜伽師地論敍卷上

總略第一

敍曰。應學瑜伽學。時依同事處行相似曰相應。相應者如如相應者方便善巧。相應者菩提涅槃學。瑜伽學能自他利曰瑜伽師。攝一切理盡。攝一切事盡。所依能持其象如地。曰地論。非他師非他論。依主釋。曰瑜伽師之地論。師攝論盡。論攝師盡。持業釋。曰瑜伽師卽地論。將敍瑜伽略舉四義。一曰五分以敍。二曰十要以提綱。三曰十支以暢義。四曰十系以廣學。而以緒言終焉。

五分第二

且初五分以敍事者云何瑜伽五分耶。三乘根本有十七地以爲宗要。攝文義盡。曰本地分。釋地中不盡要義。曰抉擇分。釋地中諸經說解儀則。曰釋分。釋地中諸經名義別異。曰異門分。釋地中三藏眾要事義。曰事分。初一是論。故稱地論。後四爲釋。釋不名地。攝故名分。曰瑜伽五分五分敍事云何耶。曰本論一分。以三相攝十七地。釋論四分以重明攝本論及經。云何本論一分以三相攝十七地耶。今且略舉其事。凡教所明惟有三種。曰境行果。是稱三相。依境起行證。

果如是而爲教故境攝九地五識及意曰境體。一切皆以識爲體故尋伺三地曰境相。上下麤細別故等引及非有心無心曰境用。定散隱顯別故行攝六地聞思修三曰通行三慧修行被一切故聲聞緣覺菩薩曰別行隨機修法成自乘故攝二地有餘無餘是曰通果。自性無住別惟被大此不詮別惟普被故是爲略說十七地義。

次復廣說者顯由五門六識身轉謂自性門所依門所緣門助伴門作業門此作業一門意地開十五勝相此自性五門色心所攝意地則開十義十五勝相

者始於分別所緣審慮所緣。終於內分死生外分成壞。成後諸法二十四類。諸如是等。十義者。色聚相應三世四相四緣三性。增處釋名。善巧攝事。增處法差六百六十諸如是等。法相無邊。一識呈現。豈其識外別有因緣。是爲五識身地意地敍境體事。顯由五門三界法相施設建立。一界門界地處所業報因果。以九門敍。二相門。則釋尋伺七相。三如理作意門。善及福慧求受正行三乘資糧。以八相敍。四不如理作意門。外道異論以十六敍。五雜染門。煩惱及業以九門敍。生四門敍。是爲尋伺等三地敍境相事。又復應知。

七與四十本末作意明定方便。四相三十二相明定相貌。五蓋食非食。明定障礙對治。其前安立門。初禪五法。四禪十二支分。及其別名。明靜慮義。其後經宗要門。明解脫等持等至義。如是說等引地。自性不定有十二相。說非等引地。一地門。二心亂不亂門。三生不生門。四分位門。五第一義門。如是說有心無心地。是爲三摩呬多地。非三摩呬多地。有心無心地。敍境用事。

復次於五明處聽受憶誦無倒解了。名聞所成地。內明四相。謂三藏等事。大小乘句。四十五想聖教等義。

增十法門教應知處。醫方四巧。因明七事。聲明六相。工業十二。如是五明。世出世閒法相事理。一切攝盡。菩薩利他。如車有輪。如舟有楫。是故應學。於三種相。相應善巧。名思所成地。一思性清淨。有其九相。二思擇所知。相性有無。各得其五。於有知有於無知無三思擇。諸法謂擇契經及與伽陀。勝義伽陀。有四十四明。無我理意趣伽陀。有五十一明。三學義體義伽陀。有九十一明。法性別。如是三相。一切了義抉擇。無遺。是故應學。於四處七支。相應善巧。名修所成地。生處無缺。爲處所修。聞法圓滿。涅槃爲首。熟解慧熟爲因。

緣修。修習對治爲瑜伽修。世出世閒。一切種淨爲證果修。如是四處七支。廣聖教盡。除此更無。若過若增。是故應學。是爲聞思修三地敍通行事。

聲聞地四持。初種姓持。說其戒事。二補特伽羅持。說三學依事。三安立持。說止觀事。四世出世持。說定慧事。初持三品。觀行所依。先須種姓。故先之於種姓。自性建立。相及有情總略爲一名。爲種姓。聖道有種方便。趣求故。次之於趣入。正入二性八建立。已入八相。四有情總略爲一名。爲趣入。已入聖道。便出塵行。故次之於出離。三界世禪離繫解脫。二種離欲及其資。

糧總略爲一。名爲出離。夫資糧者。自他圓滿善法樂。欲戒根律儀於食知量。恬寤瑜伽。正知而住。善友聞思無障慧捨沙門莊嚴。如是多義。戒學所攝。是爲初持種姓瑜伽說戒事。次持十七。約爲三聚。初聚爲學。有其六事。能證出離二十八類。由十一義差別建立。如是說品類建立事。有分別無分別事。邊際所作成辦。五停心。五善巧。四禪四諦。如是說所緣事。諦定神變。說教授事。三學三根及三解脫。正說學事。十想對治說。隨順學法事。是爲初聚六事。次聚瑜伽。有其七事。四壞四力。作意依緣學修及果。次第說七。是中有

四想修。有三十七菩提分修爲瑜伽修。應勤修學。是爲次聚七事。三聚雜義有其四事。如是三聚諸多妙義。是爲二持補特伽羅瑜伽說三學依事。三持安立。則有五事。佛法鄭重。教學儀軌。如應作已。然後安立。安立五事者。一儲定資糧。二引定遠離。三正說定相。止九住心觀四種慧。三門六事。九種加行。是爲心一境性。所說定相。四止觀淨障。五作意證定。取相得定。如是五事。鄭重安立。是爲三持安立。瑜伽說止觀事。已得作意。瑜伽師已入少分樂斷。或念世間趣。則以作意對治離三界欲。八定二定五通。生處及相。一切

有漏功德次第修習如是略爲一事或念出世趣依四諦境起七作意乃至證得阿羅漢果此七作意分配五位了相方便位勝解善根位遠離見道位觀察攝樂加行究竟則修道位果則究竟位如是略爲一事是爲四持世出世瑜伽說定慧事聲聞三學戒亦平等然對治適用非論勝劣平等非終根本資始大乘利他無不應悉本乘自利不厭求詳如是四持說聲聞地獨覺攝聲聞藏此論簡略惟說五相今姑不敍。

菩薩地三周明義立爲四持開爲十法廣爲二十七品初周十八品者因持於果前持於後種姓爲本有大勢力立種姓品爲種姓持資糧具備希望遂生求果利他自然欣愛立發心品爲發心持既發心已方便求學學相有三曰所學處者菩薩觀行利他爲本故先之於自他利行不孤起必依於理故次之於真實義既證真實遂有妙用故次之於威力威力何作成熟自他故次之於成熟如是七法五品說所學處曰如是學者菩薩欲於初所學處精勤修學先應

發願願是勝解解已求法。自既得法應爲他說說已自修教授教誡令他修斷便能發起善身語意爲十力種子名力種姓如是一品說如是學曰能修學者始於自分中於勝進終於得果。自分之初修造自利故先之於六度。自分之實修造利他故次之於攝事勝進之初行隨緣行故次之於供養親近無量。勝進之實行內證行故次之於菩提分因成言功果滿稱德。故終之於功德如是十品說能修學立是三學十六品爲菩提分持是爲初周十八品種姓持此周明十二住所行之法詳前略後詳因略果是故名種姓

持種姓發心及自他利人道之基。勝仗基起是故應學真實義品。二智四實中道義成凡小偏空。如湯沃雪論以是爲宗宗以是爲依是故應學六度各九菩提分中有十五行曲暢其事抉擇其義殊勝殊勝廣博難稽是故應學是故初周名種姓持二周四品者種姓具備菩薩相成故先之於相家及非家五相依處故次之於分相分行法從意樂起故次之於增上意樂行起於樂而依於位故次之於位是爲次周四品發心持此周明十三住能行之法修造功強行用漸勝隨彼前法起此後修故又名隨法持始於具相

昌於意樂歸於極住。哀愍愛語勇猛惠施解深密經是爲具相。七相憐愍十五意樂十事所行是爲意樂種姓勝解位在地前極喜三學有功用住位至七地無功無礙最上最極位爲究竟。是爲極住。是故次周名隨法持。世俗發心位在初住。真證發心位在初地。是故次周名發心持。三周五品者始於自分中於勝進終於得果菩薩自分利樂有情不取涅槃長輪生死。故先之於生法爾趣生法爾度眾故次之於攝受。行必依地自分階級故次之於地依地起行始從勝進終至究竟行成熟行故次之於行大劫勤功終不

唐果本心暢遂建立攸成故終之於建立是爲三周五品加行持此周約十三住爲七地重明因果以鄰果因詮極因果故又名究竟持無住功德盡於未來鄰果加行與初周異是故三周名加行持三持以外更有四持但敍品次不別立文如是說聲聞四持菩薩四持是爲聲聞獨覺菩薩三地敍別行事。

復次有餘依三相一地二寂靜三依無餘依三相一地二寂滅三異門是爲有餘依無餘依地敍通果事以上三相六事略爲一處是名本論一分以三相攝十七地。

云何釋論四分以重明攝本論及經耶。重明攝論惟此抉擇重明及經惟餘三分。抉擇攝論者初抉境義抉五識身地意地略義十門廣義六門略義門中因緣八相分別五相建立賴耶大乘教明唯識宗成廣義門中自性差別次第依止及與攝義都爲六聚。名十九義色有十義諦等五聚如是種種蘊善巧攝界相等略界義等廣都十八義界善巧攝處攝六義緣起五義處非處四義及教因廢立次第次弟之中作業假實諸如是等八門分別境無境等依處證得攝食諸句六門分別如是種種根善巧攝此六善巧多

門分次中道教明法相宗成二宗事相本地所略抉擇所詳抉擇於本卽彼前義攝入重明爲文攝文前未明義更復加詳爲文攝義抉擇要義勒不盡文爲義攝文以抉擇智擇諸地異爲義攝義是故治瑜伽者二分合治義始備悉此廣略義境中精要菩薩地義行中精要是故古諸譯家全論未暇決定藏論地持善戒惟獨先行抉尋伺三地雜抉二門正抉三門抉三摩呬多地五門抉非三摩呬多地詳明十二能所對治抉有心地明能所依及俱有依抉無心地心不生因有其七種是爲抉擇境義

次抉行義。抉聞所成地五門。抉思所成地。雜抉五門。正抉則有色無色有見無見。是等廣辨二十九門。抉修所成地。明十六修義。如是爲通行抉擇。抉聲聞地總有三門。此初門中五義通難。成無種姓。無姓決定用義斯彰。亘古亘今。無邊無際。惟此用義流轉不逾律儀十二。雜六十四皆此要義。是故應知。抉菩薩地發心二利。皆有抉擇。眞實品中約五事。辨眞實義。有十門。十二門。約三性。辨眞實義。有七門。九門。十一門。本地所略。抉擇所詳。中道義在。鄭重殷懃。威力成熟。菩提力種。六度覺分。亦有抉擇。功德品中。破惡取空。

論不信大無倒證法。殊勝證住。爲初引導解深密經。爲後憑依。此與真實。惟此宗有。彼性此用。彼初此終。妙味醞釀。智者應學。住及建立。亦有抉擇。此外易明。不復再抉。釋寶積經。總十六相。菩薩教授。於此纂詳。如是爲別行抉擇。是爲抉擇行義。

次抉果義。有餘依無餘依二地。有十四門。是爲抉擇果義。如是抉義。一分所聚。是爲本論。餘分重明攝論。三分及經者。初攝釋分。有二義明。一說法五分。二解經六義。說法五分者。諸佛語言。九事所攝。依經造論。不離其則。諸說法師。於諸聖教。先爲自求。若文若義。

次復爲他轉五種釋。又應勤求師德十種安立自身。安立身已處五大眾以可喜樂八種言詞爲眾說法。又安處他令住恭敬無倒聽聞。又應先讚大師功德。若有具足如是五分說法者。卽令自他樂利得五勝利。又經中說。住學勝利慧爲上首解脫堅固念爲增上。依彼五分分分詮表。是爲勝利。但此勝利惟繫聲聞聲聞是佛隨順修學真實子故。解經六義者。偏知九事。伏惑趨善。如病行智厭離解脫。我生已盡諸如是等。是爲初攝釋分。

次攝異門分。獨抉經文爲攝釋分。並抉其義。是稱爲

門。門一攝多。又稱爲異。曰異門分。白品四聚。師等八門。門一攝多。又稱爲異。曰異門分。白品四聚。師等八門。智等十五。如來等十。欲等九門。黑品一聚。生老死等有十一門。是爲攝異門分。

三攝事分。云何爲事。謂三藏事。初契經事者。有二十四攝。契經盡。且說其四。一者。諸佛語言。九事所攝。爲四阿含。展轉傳來。名事契經。二者。十二分教。除其方廣。名聲聞相應契經。三者。卽方廣分。名大乘相應契經。四者。五犯聚過。百五十學名別解脫契經。如是四經。抉擇其要。於未顯義。令極顯了。名摩呬理迦。謂之爲擇。亦稱爲攝。如是擇攝。厥有其七。一行擇攝。行卽

是蘊。有其十聚。九十八門。二處擇攝。前有四聚。三十
六門。後亦四聚。四十七門。三四五六。緣起食諦及界
擇攝。緣起四聚。三聚。三十一門。食一聚。六門。諦亦一聚。十
有二門。界則三聚。二十七門。覺分。十聚。七十三門。綜
而計之。三十七聚。三百有二十門。羣經要義。貳備無
餘。欲明經要。當於是處。綜覈研求。是爲初契經事。次
調伏事者。四種經外。或阿含外。世尊所說。別解脫經。
廣作問答。展轉傳來。名毗奈耶。摩呪理迦。今更擇攝。
都爲一聚。十有一門。是爲次調伏事。三本母事者。對
法能生餘二要義。名爲本母。先標名敍。後釋名辨。稱

敍辨攝。此有一難。經律抉擇。卽爲論藏。更無別稱。摩
呪理迦。卽有一釋。然因略攝。轉滅染淨。雜說法故。建
立分別法。相磨呪理迦。初略二門。流轉雜染。二十二
事。還滅清淨。十有九事。後廣八門。如是一聚。又有六
門。更十八門。如是一聚。是爲次本母事。如是所攝三
藏諸事。是爲攝事分。如是釋異及事三分所聚。是爲
本論餘分重明攝經。以上攝經及與攝論。略爲四處。
是名釋論。四分以重明攝本論及經。

十要第三

說五分已次說十要。十要者。一。唯識義。二。法相義。三。

平等殊勝義。四相應義。五依義。六用義。七漸義。八無種姓義。九異門義。十依經義。

一唯識義者。眾生執我蘊處界三方便解救。遂執法實心外有境。救以二空。又復惡取。是故唯言遣心外有境。識言遣破。有執之空而存破空執之有。真此二義立唯識宗。以有爲空。若無以空爲有。亦去證真觀位。非有非空。若執實有諸識可唯。亦是所執長夜淪迷。然此宗義雖對治二。而心外有境趨重偏多。一切山河相分現影。他心神變。並是疏緣。以心觀心。入無分別。乃是親緣。諸修唯識觀人。應知有漏諸相。皆依

三性之所。悉轉八識之能。又復應知多聞熏習無漏種生。尋思意言得如實智。歷次五位無功用行。而後金剛道盡異熟。皆空。唯識之果於斯遂證。然此無分別義。後得並行。非唯根本。但任運緣說無分別。如是諸義。五識意地及諸抉擇應善披尋。是爲略說唯識義。

第二法相義者。世尊於第三時說顯了相無上無容。則有偏計施設性。依他分別性。圓成真實性。復有五法相名分別正智。如如。論師據此立非有非空中道義教。名法相宗。偏計是空。而非是有。依圓是有。而非

是空。依他攝四相名分別及與正智圓成攝一所緣真如。是則詮表一切皆屬依他。許有雜亂識。遂有如是事。所謂六善巧事。三雜染事。三界事。五位事。十度事。十地事。三十七菩提分事。二十七賢聖事。十八不共佛法事。諸如是事無量無邊。然復應知諸如是事有而不真。惟是虛妄。猶如幻夢光影谷響。又復應知諸如是事雖是虛妄。然有相在而非是無。若能如是觀諸實相。能所二取增損。二見自然消殞於彼不轉。是故法爾塵刹法爾寂靜法爾功德法爾涅槃。是故諸修法相觀人。莫不於法方便善巧。是故善巧義是

般若義。如是諸義。菩薩地及諸抉擇應善披尋。是爲略說法相宗義。

復次於唯識法相二宗。相對互觀其義。始顯略有十義。一者。對治外小心外有境義。建立唯識義。對治初大惡。取空義。建立法相義。二者。若欲造大乘法釋。應由三相而造。一由說緣起。二由說從緣所生法相。三由說語義。是故由緣起義。建立唯識義。由緣生義。建立法相義。三者。觀行瑜伽歸無所得。境事瑜伽廣論。性相。是故約觀心門。建立唯識義。約教相門。建立法相義。四者。八識能變。三性所變。是故能變義。是唯識

義所變義是法相義。五者有爲無爲一切諸法約歸一識。所謂識自性故識所緣故識助伴故識分位故識清淨故。又復以一識心開爲萬法。所謂五蘊十二處十八界二十二根四諦等。是故約義是唯識義。開義是法相義。六者精察唯識纔一識生而自性所依所緣助伴作業五相因果交相繫屬纔一識生四識互發。又復精察法相雖萬法生而各稱其位法爾如幻就彼如幻任運善巧宛若爲一是故開義是唯識義。約義是法相義。七者了別義是唯識義。如如義是法相義。八者理義是唯識義。事義是法相義。九者流

轉真如實相真如唯識真如義是唯識義。安立真如邪行真如清淨真如正行真如義是法相義。十者古阿毗達摩言境多標三法。今論言境獨標五識身地意地。是故今義是唯識義。古義是法相義。是爲略說二宗互相爲對義。

第三平等殊勝義者。聲聞藏平等平等菩薩藏殊勝殊勝。十一分教聲聞契經平等平等方廣一分大乘契經殊勝殊勝。一涅槃。二染淨。三學。四諦。四念住。五停心。六善巧。七作意。八背捨。八支聖道。九事。九結。九徧知。十徧處。十無學支。十六行。十六心。二十八補特

伽羅三十七菩提分法。如是聖教平等平等。一大悲二障斷二如理如量智。三無性三自性四攝法四真實。五法五明五真實相六度七地八識九德大十地十三住十五行十八不共佛法。如是聖教殊勝殊勝。律儀聚戒禁防爲體平等平等。攝善法聚戒饒益有情聚戒四重四十三輕勤勇爲體殊勝殊勝。下地修上地定平等平等。出入生死長劫大定殊勝殊勝。根本無分別般若波羅蜜平等平等。後得有分別摩訶般若波羅蜜殊勝殊勝。六度平等平等。施等九門廣大甚深殊勝殊勝。平等平等。如地之有基殊勝殊勝。

如窣堵波之至頂無基不始無頂不極無基不載無項不備。是故學必有根本。舍聲聞其誰與。學必有窮至。舍大乘其誰歸。教則惟一初固平等平等。瑜伽聞思修三地是。乘則有三。後遂殊勝殊勝。瑜伽聲聞緣覺菩薩三地是。是爲第三平等殊勝義。

第四相應義者。依於等至發起般若相應勝行。此之勝行是大菩提最勝方便。故名瑜伽。一無分別。二不取相。一無分別者。法與法空不著有無戲論。名無分別。偏計相無。故法非有。彼假所依其事容有。故法非無。偏計執相空無所顯。故法空非有。諸法無我實有。

所顯故法空非無。有卽說有無。卽說無。不著戲論。如相應名無分別。執偏計無遺假事。有犯損減過。執有無外。更有一空名無分別。犯增益過。諸無窮過。非無分別。固非瑜伽亦非般若。二不取相者。非不取於離言說。相取離言相慧到彼岸。如如相應名。不取相。若都無取慧體。且無況到彼岸。如是有過。非不取相。固非瑜伽亦非般若。是故相應者。如如相應者。方便善巧。相應者。菩提涅槃。是故境相應者。如如六善巧三雜染七作意行相應者。如如五明三抉擇十六修。如如九心四慧四諦六度果相應者。如如三身四智。爲第四相應義。

第五依義者。一切生滅法仗因託緣而得生起。謂之爲依。爲彼仗託有其四義。謂爲所依。種現同時。卽說因緣有種子。依異種同時說。增上緣有俱有依。自種異時說。等無間有開導依。見相同時說。所緣緣有境界依。更有異門說。十五依攝因及緣恐繁不述。一切情器。一切體業。一切染淨各自種子。生不必一時。時

不必一事不有所依。閒斷紛叢從何安立。是故爲有所依建立阿賴耶教。披豁翳愆如實稱量。然此賴耶任運而轉。非若神我主宰特殊。所依雖同攝持大異。以是善巧何須疑畏。如是說種子依義生種不從滅生而依滅生。滅種不從生生而依生生用種不從體生而依體生。無漏種不從有漏生而依有漏而生。識種不從眞如生而依眞如而生。識種不從根生而依根生。造色不從大種生而依大種而生。自種淨土不從他生而依他生。聞種不從他音生而依他音而生。滅道種不從苦集生而依苦集而生。行種不從無明。

生乃至老死種不從生生而依無明乃至依生而生。是故各自有種是爲不卽亦爲不一。各有所依是爲不離亦爲不異。不卽不離不一不異。唯識義成法相義立。一識之中類類相依。是爲一人俱有增上多識。之中識識相依。是爲自他俱有增上。方便善巧無諸過患。以是因緣唯識義成法相義立。如是說俱有依義曠劫以前一切種子能生因性無閒傳來曠劫以後遇緣而生。善亦終古惡亦終古。何以有漏忽生無漏在潤生位。善不善等以何道理輪轉迴環。若惟任運終古不更若有遷移終須仗力。故有所依剝那剝

那開前導後依彼所依等無間緣現行王所非色非他一類而轉是故入聖超凡此依是賴如是說開導依義能緣見分帶色等相相應慮託名所緣緣帶有二義挾帶變帶相有二義體相相狀所緣二義一親二疏挾帶體相名親所緣相分逼見無別間隔故得親名有四句別一體挾體爲內二分更互相緣二用挾用心與心所緣自相分三體挾用自證緣見四用挾體本智緣如變帶相狀名疏所緣託質質卽是識實而非虛心外無境變相質爲相隔故得疏名八識則他質變自他佛身土八識因位託他本質變自相分果位他佛身土皆有疏緣七識則有

漏仗八後得緣如有漏七識無力仗八變影無漏七識後得緣如皆有疏緣六識則仗質爲疏不仗非疏五識則未轉依位依根互根五識因位之各自依根及其五根互用皆有疏緣果位則無又有異義四句之中心緣自相非是挾帶六識之內不仗質緣容變帶有然姑勿論爲帶決定爲相決定見必帶相爲所緣緣是義決定有相能緣始爲所緣有體能生始得爲緣相若離見乃在識外義不具兩不具兩義非所緣緣陳那護法樹義於前玄奘大師立量於後相不離見分寄言簡過曰真故極成色定不離眼識相不能攝相寄言簡過曰自許初三攝眼所不攝故相不攝相

亦猶眼識。非眼根攝。曰喻如眼識。以不離義。心外無境。決定決定。心外無境。心內有境。決定決定。依此境界爲所緣。緣能緣。所緣識相決定。如是說。境界依義。復次有漏必生。無漏隨順依故。增上緣中有隨順。依立引發。因謂三性種現。隨順同類勝法。便能引起同類勝行。引得無爲妙法。如是所依。一切疑畏豁然殆盡。躊躇稱心易其有極。是故此論稱爲地論。地者所依義故。是爲第五依義。

第六用義者。眞如是體。體不生滅。無始種子。依不生滅。而起生滅。如實說。相一切都是用。用有十義。一種子

義。二對治義。三破執義。四如幻義。五極微義。六剎那義。七集顯義。八周徧義。九無盡義。十正智等義。諸有不知種子義者。或執實體。宰一切物。或執無用。一切皆空。實體是染。不可使淨。實體是淨。不可使染。染淨既虛。戲論何益。一切無用。一切無能善。旣唐功惡。亦無報。因果旣壞。聖教何施。若知種子用非是體。便息分別。如理思惟。熏習義是種子義。與彼諸法俱生俱滅。而有能生因性。無閒傳來。爲後生因。是名熏習。雖無實物。而有氣分。氣分者。猶如雲起。雖無作用。而有功能。功能者。猶如輪風。雲幻生滅。刹那刹那。惟用如

是能有能無。風力廣大。排山振海。惟用如是。是有大勢力了。是以爲用。用乃無過。如是說種子義。是用義。漏無漏種。勢用齊均。流轉還滅。兩敵不並。故對治義。安立不搖。諸有不知對治義者。誤體爲用。本來寂靜。自性涅槃。不知徧計空無。惟是體性。體性不二。故有是言。若此依他種。既是有勢用自二。故須對治。盡未來際。無住涅槃。又復不知對治義者。總爲一聚。無相觀空。殊不知無相有功用行地居決定八地以前。大有事在。非可廢棄一蹴而幾。種雜而強。治須緻密。貪觀不淨。瞋觀慈悲。癡觀緣起。慢則析根。疑復數息。以楔

出楔。方便多施。盃水車薪。猶虞難任。况復昧賊所在。漫曰。討除欺敗。唐勞嗟何能及。又復觀總無力。觀別斯神。別觀久成。總觀乃當。如觀無常五蘊。無常刹那集顯。方稱現量。否則墮似飲甌可哀。是故知用義者。則知對治。知對治者。一切如理。然此對治。非斷煩惱。如斧斫木。因緣生法。猶如幻化。故不可斷。勝義諦中諸法。皆如故無所斷。當知斷者。對治生時煩惱。斷時如稱低昂。如明破暗。解惑不俱。故說言斷十地。師前後相資。一運相續。攝論師集想修斷能治。所治俱入過去。旣昧三時。又昧種義。不足爲訓。是故應辨。了是

以爲用用乃無過如是說對治義是用義無功用行但是無執非無相見猿猱知佛心佛體眾生意十方如來但是無執非無徧計是故執爲眾生執破爲佛破執爲法執之異名爲我破之異名曰用了是以爲用用乃無過如是說破執義是用義幻師通衢變現象馬有象馬相無象馬體是之爲幻有卽說有緣生有境故如幻有相是爲依他如幻無卽說無緣生無自性故如幻無體是爲徧計如幻幻相之有非眞實有幻體之無爲畢竟無是爲如幻三昧諸所分別諸所施設諸所顯真攝幻義盡攝用義盡了是以爲用

用乃無過如是說如幻義是用義諸識變時隨量大小頓現一相非眾極微積聚而成最後滅時亦不至微中間滅盡是故大乘無實極微但以慧思分析諸色假立方便法空觀成非若外小執爲我體了是以爲用用乃無過如是說極微義是用義方量旣空時量亦破是故三世都無剎那義立此剎那義非是動義前不待後此不至彼纔起卽滅相似隨轉妄相宛然不可窮詰如是有十五義成立其相有九因成內十四相有十四因成外十相恐繁不述觀剎那義者不爲時限不爲生滅不蹈定相不墮執迷亦復不陷

虛空了是以爲用用乃無過。如是說刹那義是用義三世既空刹那刹那前後不續誰復積字成文聚想成義是故集顯義立諸字諸想雖入過去刹那滅無而有熏習作後引因相應緣生聚集顯現此集顯義推廣施設有唯識三世義法相三世義神通三世義識上功能影像相生此實現念託過未種變似而緣妄謂三世而實一識是爲唯識三世義即現在種是現自相亦即現種是過果相是未因相雖實一種分別說三是爲法相三世義禪定他心通雖心上功能而皆證解無有非量故與凡異是爲神通三世義三

世非有諸法宛然萬種無邊刹那集顯了是以爲用用乃無過。如是說集顯義是用義緣都未起分別渾無是爲萬種一如獨別緣生無種不挾是爲各種周界子微以上方足相傾種且非微烏容有礙況此種遇緣顯現差別餘種未遇仍復一如是故各種周界水火相處而不侵萬種一如六根相依而錯用了是以為用用乃無過。如是說周徧義是用義既酬前果卽爲後因相引相牽金剛後斷有漏種隱無漏種顯彼去此來無窮無盡了是以爲用用乃無過。如是說無盡義是用義正智是用發菩提心成正等覺故大

悲是用無住涅槃無邊功德故方便是用一切善巧故了是以爲用用乃無過如是說正智等義是用義是爲第六用義。

第七漸義者一時二位三補特伽羅四六行伏惑五九品斷障六因果七行別八果別九無畏十能入諸昧漸義而談頓證者一切無有是故有過一時者謂三阿僧祇一阿僧祇斷皮麤重二阿僧祇斷肉麤重三阿僧祇斷骨麤重或以見道八地極果爲差或以十信見道修道爲差若無是時無量障深剎那頓斷寧可爲訓是故有過二位者謂十三住初種姓住亦

爲種姓地亦爲資糧位中順解脫分亦爲十信次勝解住亦爲勝解行地亦爲資糧位中順抉擇分亦爲加行位亦爲十住十行十回向三極喜住亦爲淨勝意樂地亦爲通達位亦爲十地中初地四增上戒住增上心住增上三慧住無相有功用住是等六住亦爲行正行地亦爲修習位亦爲十地中次第二地至七地五無相無功用住亦爲決定地亦爲修習位亦爲十地中八地六無礙解住亦爲決定行地亦爲修習位亦爲十地中九地七最上菩薩住最極如來住亦爲究竟地亦爲究竟位亦爲十地中十地及等覺

地妙覺地。若無是位。一切佛法信解行證從何安立。安立都無法。何不滅。是故有過三補特伽羅者。四惱尋思等分薄塵爲七病行。聲聞獨覺菩薩爲三出離。未具資糧已具資糧已未具資糧爲三住持。法隨信行法隨法行。爲二加行。信解見至加行果。身證慧俱修證果。向四果四沙門果。七返家家預流果。一聞一來果。中般生般無行。有行上流。不還果退思護住。不動堪達及不動法阿羅漢果。是爲二十八賢聖果。三界異生學與無學。後色菩薩欲界獨覺不可思議。如來是爲十三界有情勝解行。增上意樂行。有相無相。

行無功用行。是爲五修行菩薩。若無如是補特伽羅言說不易得失。無據。既違世閒亦常怖畏。是故有過四六行伏惑者。苦麤障三爲無閒道。觀下斷惑。靜妙離三爲解脫道。觀上證滅。二乘根鈍。斷證不融。行故資六初劫菩薩初資糧位。亦用伏惑。久修有力。不斷煩惱而生上界方始不資。若無六行惑。何能伏。伏且不能斷。於何有。是故有過五九品斷障者。三界九地。地各九品。品八十一。分別有斷無伏。俱生先伏後斷。斷分別二障。惟係六識。一心見道。唯一品斷三心見道。則二品斷。斷俱生煩惱。其六識現行地前漸伏。初

地伏盡種則金剛無閒永斷其七識現行初地漸伏七地伏盡種則金剛無閒頓斷斷俱生所知其六識現行地前漸伏八地永斷種則十地漸斷金剛永斷其七識現行地地伏起金剛加行永斷種則金剛無閒頓斷一切習氣地地漸斷是則頓唯七種餘莫不漸安有廢漸而可收功九品不分是故有過六因果者頓義是果義漸義是因義世第一法一剎那閒頓入見道是爲一頓然加行以前有無量事第八不動剎那頓證無功用行是爲一頓然不動以前有無量事金剛道後一剎那閒頓入極果是爲一頓然極果

以前有無量事舉頓遺漸是爲談果迷因有果無因是爲空華結撰是故有過七行別者少時畢功之爲頓長劫修行之爲漸我說精進徧一切故堅固熾然不思住故久遠要期爲一日故無懈無勇心平等故不貪不厭常如是故是爲行別行別然後有得否則怠懈不足言功是故有過八果別者念念證極之謂頓長劫闡提之謂漸淨障是業涅槃假名故悲心勝故證極亦功德不住故八相成道爲度生故是爲果別果別然後無得否則貪著不足言證是故有過九無畏者難行苦行施對治故生死如幻不取著故攝

持無漏種緣至必生故賴耶蘊染種多生始盡故熏習有力勝愚迷故是故無畏無畏然後能漸否則疑畏進退無據苦不勝言是故有過十能入者受熏持種無記性故是故貴漸隨喜功德反而能成故是故貴漸彼有此種驟隱不顯久乃現故彼有此種勢盛不顯殺乃現故是故貴漸否則機舛不足言入是故有過是爲第七漸義

第八無種姓義者聲聞地五義建立此復略爲十解一者障蔽不顯乃稱爲無麤重常有種姓常無故二者有種姓是隨順密意說無種姓則真實顯了說故

三者此無種姓爲精進對治者立所對究竟說非爲怠惰對治者斷能對究竟說故四者有種姓是體無種姓是用故五者建立自性涅槃之體既依有種姓卽應建立無住涅槃之用依無種姓故六者有對生死之無住涅槃卽應有對涅槃之無邊生死故七者旣許雜亂性之有卽應許無漏種之無故八者有無盡功德之能卽應有無盡功德之所故九者有畢竟無障之佛卽應有畢竟有障之闡提故十者有聲聞趣寂一分所知障之決定卽應有人天輪轉全分出世障之決定故是爲第八無種姓義

第九異門義者。宗經者論異於經解論者。釋殊於論。此宗著述言人人殊。豈自教之相違。曷冰銷而杜謗。通斯疑難。應悉異門妙理。圓融頓呈萬象。文字有矩詮限。一隅是故。尊聖重教。契經惟佛所宣。依理廣文。論議亦眾。所說世尊自廣分別諸法體相。於諸經典循環研覈。名磨咀理迦。諸聖弟子已見聖跡。依自所證無倒分別。亦名磨咀理迦。而皆爲阿毗達磨。許佛滅後三藏之內對法一藏。通弟子說。故若弟子造非教藏攝。便聖教有限。若別異詮非法義收則妙理不周。是故此宗所述多異少同。瑜伽五分異門義立。然

欲和會亦非不能隨順真實義邊。此彼義邊能所義邊。派別雖差。朝宗則一。琴瑟非專水火。豈極諸所詮義。恐繁不述。經論會違詳異門義。見諸別冊參考可資。是爲第九異門義。

第十詮經義者。一宗經。二釋經。一宗經者。經中之經。般若經。華嚴經。經中之律。瞿沙經。毗奈耶經。經中之論。阿毗達磨經。解深密經。然抉擇菩薩地。引敍深密一字無遺。是解深密經。又宗中之特宗。抉擇中之最抉擇。三學俱多。唯素咀覽。戒定多者屬毗奈耶。獨慧學多對法藏攝。欲生正智法隨法行。宜學對法。欲一

總聚多收散義。宜學對法。對法所重。雖及達磨。而最深密。以是因緣解深密經智者應學。如是說宗經義。二釋經者。尋伺三地。釋緣起經。三摩呬多。釋出離經。離憂經。六出離戒經。五支經。釋靜慮經。四檢行定經。六境不受想無想經。四趣道經。釋四淨勝經。心清淨苾芻思惟五相經。蕩塵經。三相思惟經。思所成地。釋諸伽陀經。聲聞地。釋師子吼經。普賢經。難陀經。七日經。菩薩地。釋轉有經。無盡意經。抉尋伺地。釋出愛經。八苦經。三士經。抉三摩地。釋身念處經。摩訶俱瑟祇羅經。法因緣經。眠經。抉聲聞地。釋月喻經。伐地迦經。

乞食清淨經。抉菩薩地。釋五種過患經。尸怯落迦經。釋寶積經。攝釋異門攝事。多釋四阿笈摩經。是諸釋經或釋數句。或釋數分。見諸明文約略舉此。論諸所稱雜釋餘釋。貳攝經典無量無邊。下士鈍根難可稽考。望洋嗟若。我生不辰。所冀同心廣挹甘露。如是說釋經義。是爲第十詮經義。

以上十義略舉其要是爲十要。若欲廣敍爲義威蕤。恐厭繁文。此姑不述。

瑜伽師地論敍卷上